

欽定大清會典事例

卷一百十六

吏部

處分例

欽定大清會典事例卷一百十六

吏部

處分例 考覈學政 考覈教職

考覈學政○康熙二年題准學政據教官舉報劣生不行盡法懲處者一名降四級調用二名革職○十八年議准提學有積習十弊一童生未經府考冊內無名鑽求學政徑取入學巧圖捷便一考試各府州縣衛所童生額外溢取撥發別學明收冒籍以占本學正額一彌封編號印簿及場內坐號紅簿不發該府州縣封存乃

收存學道署內。私查某卷某號係某人。對號賄賣。一考完一府。不將紅案速行發學。任意遲延。徇私通賄。更改等第。拔下作上。一每考一處。令書辦承差快手人等。出入過付。暗訪生員稍有家資者。先開六等考單。嚇詐保等有銀送入。准放三等。一文童額少。武童額多。將文童充為武童。入學之後。夤緣改文。娼優隸卒。濫行收取。善騎射者。擯而不錄。一各府地方。設有考棚。憚於親往。將生童遠調考試。其各州縣告病生員。扛擡驗病。困苦難堪。一縱容無賴教官。包攬生童。

私通綫索。效勞分潤。名為作興。大壞風教。一曲徇上司。同僚情面。並京師鄉宦私書。及親屬朋友。隨往地方。討情抽豐。將孤寒之士。棄而不錄。一報部學冊。將額外濫取入學之童生。未經科歲考試。豫附三等。其姓名不入新案。造入事故衣頂項下。以趙甲頂錢乙。混作實在之數。咨報禮部。嗣後考覈學政之時。均註剔除此十弊。若不能剔除此十弊者。該督撫指叅。有貪贓之弊者。照貪贓例革職提問。如無貪贓之處。照才力不及例降二級調用。今改為照不應重杖八

十私罪律。降三級調用。其

考覈疏內。不註剔除此十弊字樣。並未有剔除而註寫剔除者。由部查出。或科道糾叅果實。將該督撫照不報劣員例降三級調用。至督撫有需索陋規者。被科道糾叅果實。將該督撫亦照貪贓例處分。至上司同僚京官鄉宦私書及親族朋友隨往地方討情抽豐。府州縣官傳遞私書。鄉紳投刺請席者。督撫科道題叅有官者革職。無官者交刑部治罪。○二十五年議准。學政考試遲延。限內不能完結者。降一級調用。○三十一年覆准。學政或有將祠生贊禮生額外濫

行批設者。照濫取入學例議處。

今改為降一級調用。

○三

十九年議准。凡督撫勒索學院棚規。司道需索常規。及學臣與者。皆革職提問。如有勢宦京官請託。及教官巡捕進士舉人說情。並書吏卑役之類。討賞。事發有官者。革職提問。無官者。從重治罪。若學臣徇情市恩者。亦革職一併提問。知府如有包攬入學童生。要挾抑勒。將文理不通之童生考送者。或學臣申報。或督撫指叅。將知府革職提問。學臣與提調知府扶同作弊者。一併革職提問。如督撫不行查叅。學臣不行申報。

者皆革職再督撫如有藉考名色及開送秀才
童生者照勒索棚規例治罪知縣有賄薦案首
及各官效勞分肥提鎮等官說情並學臣扶同
事發皆照例治罪如學臣遇有挾制干情者准
徑封具奏上

聞再姦胥猾吏如有勾通惡劣蠹棍勢僕私親密友
招搖者令該地方官查拏照光棍例治罪再祖
父伯叔父兄為子孫弟姪營謀者事發除本童
責革外祖父伯叔父兄有官者革職無官者從
重治罪○雍正五年議准提調官如聽學政貪

墨通同作弊及引誘為非者。一經發覺。將提調官照貪官例。同學臣一併革職。提問如學臣暗通關節。私鬻名器。提調官雖無通同引誘情弊。而防範不嚴。照溺職例。革職。如有猾吏姦胥。招搖撞騙。以及受賄傳遞等弊。提調官不行訪拏究治。別經發覺。將提調官照失察衙役犯贓例。議處。儻學臣操守清廉。杜絕情弊。而提調官不得遂其引誘。反行挾制把持者。准學臣即行指叅。審實。將提調官照貪官例治罪。○七年

諭。士子者。百姓所觀瞻。士習不端。則風俗何以得厚。是

以考課士子。設立舉優黜劣之典。以為移風易俗之道。所關亦綦重矣。而無如教官愚懦無能。學臣因循苟且。往往視為具文。奉行不力。每當學臣按試之時。教官輒以無優無劣。具文申詳。草率塞責。如此則善者何由而勸。不善者何由而懲。夫善者之湮沒不彰。一時尚難覺察。而不善之人。倣幸苟免於目前。不旋踵而劣迹敗露。每見蕩閑踰檢犯法亂紀之士子。皆從前學臣教官之未曾開報劣行者。其間情罪雖難一一追究。然即此可知其中之容隱不少矣。嗣後若教官沽名邀譽。縱容劣生。不行舉報者。經學臣查出。

立即指叅將教官照溺職例革職。若學臣瞻徇情面不行糾叅者。一經發覺。將學臣照徇庇例降三級調用。將此永著為例。○又議准貢監生員。挖欠錢糧。經

州縣等官申報學政。即行黜革。照民例治罪。如學政徇隱不報者。降三級調用。○又議准官生錄科。學臣秉公嚴加考試。不許瞻徇情面。濫行錄送入場。如官卷内有文理荒謬。倖邀科第者。發覺之日。將送考官照濫行收考例議處。○十三年覆准槍手入場。經學政飭發鞠審。審儻該提調官不實力嚴緝。照軍犯脫逃例。初叅罰俸六

月再限一年緝拏限滿不獲罰俸一年。照案緝拏至槍手日久潛歸而原籍地方官漫無覺察仍聽應考。或再經作弊事發者。照軍犯私回不行查出例。將原籍地方官罰俸一年。○乾隆元年覆准學臣考試地方如有姦棍聚衆生事陵脅官長等情。學臣係封鎖衙門內外隔絕無由禁緝。該提調及地方官並駐防武職等官立即協拏務獲。審實照例分別首從治罪。若提調及地方官事前不能豫先禁止。事後又不嚴拏及批審之後。徒以一二軟弱無辜抵塞結案者。聽

督撫學臣據實題叅交吏部嚴加議處

今增為照刀民

聚衆例降三級調用

武職交兵部議處其廩保不加詳慎

濫保匪人以致場内生事者將該生褫革○又

覆准直省選拔貢生咨送到京

欽點大臣嚴加考試儻該學政

今增督撫

不秉公覈實有

徇情冒濫等弊及咨送到京考試有學問荒陋

人品不端才具庸劣者除本生褫革外仍將該

學政照例分別嚴加議處

今增為有將文理荒謬品行不端才具平

庸徇情拔取者降二級調用如文有疵累不稱拔貢之選者均照混行送考例降一級調用

○又議准生員偶有過愆止應戒飭者地方官

會同教官。照例在明倫堂扑責。如有擅自呵叱

飭責者。聽學臣查叅。以違例處分。

今改為降二級留任。因而

致死。降二級調用。故

其有肆行不法等事。該

勘致死。照例治罪。

地方官一面查拏。一面申詳督撫學臣。革退審

理。如地方官挾私妄報。查出。將地方官照例分

別叅處。如係生員恃衿橫行。嚴審按律定擬。

四年覆准。各省學政。將欠考各生。務令按次補

考。即於彙報歲科學冊內。分別補考一項。逐一

細註。以憑查覈。如有將數次止考一次。及徑行

附等之處。即照徇情例議處。

今增為係蒙混。降一級調用。

二十四年覆准各省學政發審事件。一面發提調官訊問。一面咨明督撫稽察。提調等官仍行具文通報。除例應當場完結者。聽提調官隨時發落。報明學政完結。並報督撫銷案外。其枷責以上罪名。俱照例擬議。一報明學政。一詳解藩臬覈轉。督撫分別批結咨題。如提調等官奉到學政批檄。不行通報。除罪有出入。分別故失。照例叅處外。即罪無出入。亦照應申不申私罪律。罰俸九月。今照公罪律。改為罰俸六月。○二十五年覆准場外平民生童人等。有藉稱買求考取名色。撞騙

招搖不行查拏。別經發覺者。提調官免其查議。

今增為罰俸六月。

將失察之地方官。照失於查察例。罰

俸一年。如有徇隱姑容等弊。照徇庇例。降三級

調用。至提調與地方官。果能實力查拏。將罪犯

全行拏獲者。將全行拏獲之官。紀錄一次。

今增為若

但經破案。審辦案犯。未能全獲。免其處分。

○三十七年奏准。地方官

果有不公不法。陵辱士子。及縱役毆辱等情。生

童等身受其害者。准赴該管上司衙門控告。審

實。即將地方官題叅。按其情罪之輕重。照例議

處。儻該管上司袒護地方官。不行准理。或徇情

營私。剖斷不公者。將該上司從重議處。如有聚
衆罷考。挾制官長等事。除將同行罷考之生童
照例懲治。地方官及該上司。均照刁民聚衆例
查辦外。將董率無方。不能約束之該教官。照溺
職例。革職。儻學臣市恩邀譽。暗中寢息。或將罷
考案內之人。濫行收考者。該督撫查叅。將該學
政照徇庇劣生例。革職。該督撫通同徇隱者。一
併嚴處。今改為降三級調用儻於生童罷考之時。教官畏
懼處分。為之調處。寢息其事者。一經查出。將該
教官革職。交刑部治罪。○四十年

諭。據徐績覆奏體訪該省學政一摺。內稱現任學臣莊存與抵豫未久。容悉心體訪。屆期據實具奏等語。殊不曉事。朕前諭各督撫於學政差滿回京時。各就所見秉公據實密奏。原指四品以下之翰詹科道部屬等員。或其才具有可備道府及兩司之用者而言。若侍郎閣學及三品以上京堂。皆朕所簡擢。其平日能否辦事。素所深知。又何必復藉督撫之體察。况三品以上官階已崇。亦斷無因督撫奏其嫻於吏治。轉用為道府及兩司之理。今徐績既有此奏。恐他省督撫亦有似此。未能體會朕意者。著再傳諭各督撫。嗣後